

本草綱目拾遺

本草綱目拾遺鱗部目錄

脆蛇

環蛇

翠蛇

碧飛

鱗油

斷草烏

龍涎香

龍泄

西楞魚

鱗魚鱗

苦魚

金魚

阿羅魚

漢陂魚

四足魚

河豚目子

蜣蝦魚

蜜姑魚

雪鮓

帶魚

血鱗

沙魚翅

土附

烏魚蛋

青魚膽

白皮子

鮓魚

本草綱目拾遺介部目錄

海龍

海牛

白鼈

鼈膽

蛭殼

海螵

吐鐵

田螺涎

蛤蜊肉

蜆腊

蚌淚

西施舌

石蚶

乾蝦

蝦米
蝦子

鶯爪
對蝦

蝦醬

石上螺螄

本草綱目拾遺蟲部目錄

雪蝦蟇

海參

隊隊

風蛤

飯蒼蠅

蠨蜂

蜜蜂

苦蜜

蜜虎

蟾皮舌

土檳榔

蝦螯黃

藥蜂針

驢龍

龍蝨

淨蟲糞

蟋蟀

蚱蜢

淮東子

燈蛾

蠅虎

竈馬

水馬

壁蝨

叩頭蟲

沙雞母

禾蟲

茄裸蟲

椶蟲

蔗蛄

桃絲竹蠶

牙皂樹蟲

黃麻梗蟲

芝麻蟲

桐蛀

牛膝蛀

山螞蟻窠

子

蛆窠

死人蛆蟲

人疔

虹蟲

本草綱目拾遺卷十

錢塘趙學敏恕軒氏輯

鱗部

脆蛇

雲南志順甯府出脆蛇見人則斷人去復續取而
乾之可治腫毒○滇黔記遊出滇黔土司長尺餘
伏草莽見人輒躍起跌數段頃復合一色如白金
光亮悞拾之觸毒卽斃○陳鼎蛇譜脆蛇產貴州
土司中長尺有二寸圓如錢嘴尖尾禿背黑腹白
暗鱗點點可玩見人輒躍起數尺跌爲十二段須

與復合爲一不知者悞拾之卽寸斷兩端俱生頭
齧人卽斃出入往來恆有度捕之者置竹筒於其
逕側則不知而入其中急持之方可完稍緩則碎
矣故名曰脆子家多蓄奇藥曾購得其腊見寸斷
處皆光潤如新截然亦一異也○查慎行人海記
脆蛇出崑崙山聞人聲卽寸斷人伺其斷鉗取之
須寸各異處待風乾入藥若少頃無人聲寸寸仍
續成蛇

治色癆及驚疑喪膽諸症

玉鏡新談

肉熬膏箍癰疽去風癘其骨醋磨圍腫毒良

接斷骨 滇黔記遊脆蛇人得而腊之用接斷骨
價值兼金視其上中下治頭腹脛股無不效

大麻風 痢 滇畧脆蛇一名片蛇產順甯大候
山中長二尺許遇人輒自斷爲三四人去復續乾
之色如黃金治惡疽腰以上用首以下用尾又治
大麻風及痢近人貨之爲夾棍藥

環蛇

蛇譜云出三佛齊國如環大數圍至數十圍者逐
獸卽疾走如轉車輪於千仞山獸入環中卽斃其
口眼俱生環之半與尻相對

脂服之刀劍不能傷

翠蛇

珍異藥品云形如曲蟮長可五六寸蟠旋作圈

治癩毒癰疽良

碧飛

湖州府志武康山多蝮蛇名碧飛大者如團囊小亦如杯案斧首出目鋸齒方交而綬色厥雄赤紫厥雌青黑色眦睛如蜃甲光目亦如之山中人謂有目而無視也春夏布絲草蓀人物觸絲激射迅於矢忽不見已攫肉去矣殺人至死霜降絲脆升

高樹杪施吐白涎烏鵲下啄則吞之惟鹿以爲膳
獾獲之前左足扼其腰中首尾盤繞右足叉趾寸
解啖無餘者人得而腊之可入藥凡西北諸山自
餘英嶺而內皆是物也

治風痺蝮傷人被其齧者還食其肉則生

敏按湖志所言碧飛吾杭山鄉多有之土人名方
勝板以其遍身花紋如錦中方勝形匾似板故名
蝮人最毒惟野猪能食之土人言冬日蛇蟄地中
野豕嗅其氣輒翻石掘土出而啖之蛇性大熱野
猪食三條卽能過嚴冬綱目蝮虺爲二蝮卽方勝

本草綱目卷之九
板虺卽土錦俗呼灰地區是也惡風頑痺非此猛
烈積熱之性驅之則肢廢者不能復舉始以毒攻
毒之義想碧飛或同類而異名者書此以俟証

蟒油

爾雅蟒王蛇注蛇中之最大者故曰王蛇今深山
處處有之大小不一色如菜花蛇而較黃頭上皆
有王字亦有黑色者土人名曰烏蟒捕蛇者有呼
蛇法不拘何種蛇呼之卽至末後俟蟒到則諸蛇
皆圍伏不動聽其擇取惟不敢傷蟒傷則諸蛇
無主環起嗾人聞其人云蟒蛇自有此種生而皆

有王字故不論大小也蟒至則諸毒蛇皆不敢傷人

治漏瘡 集驗取蟒油銅鍋內熬熟隨將黃蠟入油內攪勻油紙攤膏貼患處十餘日便封口全愈按蟒蛇名王字蛇其首天生有一王字予於庚子在奉化長橋見丐者手握此蛇乞錢其蛇亦不甚大性頗馴良因以千錢買得縱之綱目諸蛇獨遺此因急補之

斷草烏

粵志斷草烏出廣中蛇也大僅指許長五六寸頭

如龍形而小身純烏其行也百草沾之立斷人見
斷草輒跡得之故蛇每離地丈許使身如矢直以
入穴使不沾草人莫得而跡之此亦烏蛇中一種
綱目烏稍蛇不載龍頭者一種故錄其遺

治大麻風煮酒服

龍涎香

龍池

通雅龍涎有嶼在花面國傍獨立南海中彼人言
於樹收之最收香氣今大內甜香用之○澳門記
畧大食國產龍涎香爲上西洋產於伯西兒海焚
之則翠烟浮空結而不散坐客可用一翫以分烟

縷。○嶠南璣記龍涎香新者色白久則紫又久則黑白者如百藥煎黑者次之似五靈脂其氣近臊和香焚之則翠煙浮空不散試法將結塊者奮力投沒水中須臾突起浮水面或取一錢口含之微有腥氣經宿其細沫已燻餘膠結舌上取出就濕秤之仍重一錢又乾之其重如故雖極乾枯用銀簪燒極熱鑽入枯中乘暖抽出其涎引絲不絕驗此不分褐白褐黑俱真海東札記海翁魚大者三四千觔小者千餘觔卽海鰈也皮生砂石刀箭不入或言其魚口中噴涎常自爲吞吐有遺於海濱

者黑色淺黃色不一卽龍涎香也聞上淡水有之
欲辨真贋研入水攪之浮水面如膏以口沫擦成
丸擲案有聲噲之通宵不耗分毫者爲真每兩值
數十金廣志新安有龍穴洲每風雨卽有龍起去
地不數丈朱鬣金鱗兩目如電其精華在浮沫時
噴薄如澹泉如雨土人爭承取之稍緩則入地中
是爲龍涎或謂龍涎多積於海上枯木如鳥遺狀
其色青黛其香腥雜百和焚之翠烟千結蜿蜒蟠
空經時不散可以翦分香縷然多不真從番舶來
者出大秦波斯於雨中焚之膈膊有聲者真坤輿

圖記龍涎香黑人國與伯西兒兩海最多有大塊
重千餘觔者望之如島每爲風濤湧泊於岸諸蟲
鳥獸亟喜食之汪機本草龍吐涎沫可制香○星
槎勝覽錫蘭山國卜刺哇國竹步國木骨都束國
刺撒國佐法兒國忽魯謨斯國溜山洋國俱產龍
涎香○稗史彙編龍涎香白者如百藥煎而膩理
極細黑者亞之如五靈脂而光澤其氣近於燥似
浮石而輕香本無損益但能聚香耳和香而用眞
龍涎焚之則翠烟浮空結而不散坐客可用一翫
以分烟縷所以然者入罨氣樓臺之餘烈也泉廣

合香人云龍涎入香能收斂腦麝氣雖經數十年者香味仍存。廣東通志龍涎在水采者褐黑色在山采者褐白色。東西洋考海傍有花若木芙蓉花落海大魚吞之腹中先食龍涎花嚙入久卽脹悶昂頭向石上吐沫乾枯可用惟糞者不佳若散碎皆取自沙滲力薄。范咸臺灣府志龍涎香傳爲鯨魚精液泡水面凝爲涎能止心痛助精氣以淡黃色嚼而不化者爲佳出淡水者皆淡黃色無黑色。朱國楨大政記龍涎香出蘇門答刺國西有龍涎嶼峙南巫里大洋之中羣龍交戲其上

遺涎焉國人駕獨木舟伺採之舟如龍形浮海面人伏其中隨風潮上下傍亦用槳龍遇之亦不吞也每一觔值其國金錢一百九十二枚准中國銅錢九千文嘉靖三十四年下戶部取香百觔通市京師不得下廣東藩司採買部文至臺司集議懸價每觔銀一千二百兩僅得十一兩上進內驗不同姑存之亟取眞者部文再至廣州夷囚馬那別的貯有一兩三錢上之黑褐色密地都密地山夷人繼上六兩白褐色細間狀之黑者採在水白者採在山皆眞不贗尋有密地山商再上通前共得

十七兩二錢五分次年進入內辨驗是真許畱用
自後夷船聞上供稍稍挾來市始定價每一兩價
百金龍涎之爲用也入香合和能收斂腦麝清氣
雖數十年香味仍存得其真者和香焚之翠烟裊
空不散涎沫有三品曰汎水曰滲沙曰魚食汎水
則輕浮水面普水者伺龍出取之滲沙則凝積年
久氣滲沙中魚食則化糞於沙磧惟汎水者可食
香用又言魚食亦有二種海旁有花若木芙蓉春
夏間盛開花落海大魚吞之若腹腸先食龍涎花
嚙入久卽脹悶昂頭向石上吐沫乾枯可用惟糞

者不佳。○嶺南雜記諸香龍涎最貴，市值每兩不
下百千次，亦五六十出。大食國近海有雲氣罩山，
澗知有龍睡，下或半年一二載，土人守視，雲散則
龍已去，必得其涎五七兩，或十餘兩，眾共分之。又
大洋中有渦旋處，龍在其下湧出之涎，日燦成片，
風漂至岸取之，又嶺外雜記龍枕石而睡，涎浮水
積而堅，新者色白，久紫甚。久者黑氣，近燥形如浮
石而輕膩，理光澤，入香焚之，翠烟浮空，結而不散。
又出沒海上，吐出涎沫有三品：一汎水，二滲沙，三
魚食汎水，輕浮水面，善水者伺龍出，隨取滲沙，凡

風浪飄泊舟嶼積年氣盡於沙土中魚食涎作糞散沙噴氣腥穢進貢亦不過四兩

按龍涎論色則瑣記言有白與紫黑之分而札記又有淺黃色廣志有青鰲色辨真偽亦諸說互異大抵不必論其色總以含之不耗投水不沒雨中焚之能爆者良東壁綱目鱗部龍下龍腦龍胎俱有主治而於龍涎獨遺之惟附其名云龍涎方藥鮮用惟入諸香云能收腦麝數十年不散出西南海洋春間羣龍所吐涎沫浮出者番人採貨之亦有從大魚腹中剖得者其狀初若脂膠黃白色乾

則成塊黃黑色如百藥煎而膩理久則紫黑如五
靈脂而光澤其體細飄似浮石而腥臊其說亦未
確核蓋所云魚腹中得者卽札記所云海魷魚之
精也亦名龍涎出臺灣不若大洋中產者佳夫龍
腦龍胎世上所無龍涎則閩粵貨售者多東壁何
得於罕見者載之於所有者反畧之耶則甚矣該
博之難也入藥用隔湯頓化如膠糖狀者佳

氣腥味微酸鹹無毒。藥性考味甘氣腥性潛。○
張瑤實云夾砂者有小毒乃土人於砂磧上收取
之入藥須以甘草水煮過用。酉陽雜俎云龍齋

遇烟煤則不散入藥忌鐵器及石膏

活血益精髓助陽道通利血脈。廖永言驗方云
利水通淋散癥結辟精魅鬼邪消氣結逐勞蟲尸
疰。陳良士云在澳門見倭夷用合船硫及他藥
作種子丸云漢時術士和丹用此倭夷皆有其方
祕不傳中國。札記云出淡水者止心痛助精氣
○周曲大云龍涎能生口中津液凡口患乾燥者
含之能津流盈頰微若有腥氣粵中夷人合龍涎
丸和他藥便不腥入口亦不耗滅一丸可用數
十年不敗如單用龍涎入藥須先用雞湯將龍涎

制死則入腹便化否則入腹絲毫不損蓋極難尅
化者方書云焚之其烟能入水孟子嘗試之多不
驗

按龍乃東方之神其體純陽能噓氣成雲陽之質
輕浮故雲上升其骨反入手足少陰厥陰經者蓋
凡知覺運動之物皆肖陰陽以立體孤陽則不生
龍秉純陽而骨反屬陰入藥能收陽中之陰治心
腎諸病所謂一陰一陽之謂道也其實靈其齒能
治魂遊不定鎮驚癇凡病在肝而龍主肝木治之
最神涎乃陽中之陽故其氣絕香龍屬木木之氣

得太陽多者必香故諸香以龍爲最得孟水徑撲其中不落空外龍以水爲用見水則精入焉入藥所以能利水道分陰陽能殺精魅鬼邪者亦以至陰之物見眞陽而立解也

龍泄 河南薛姓客言曾在嘉興永太守處見有龍泄結成大塊其質亦輕有六七兩及觔許不等每塊皆起螺旋紋如象牙花紋其色有純黑有褐白二種欲辨眞僞刮屑少許以滾水泡之其氣悉滲而成雲遇婦人雲輒撲入髮際旋繞不散蓋龍性好滯故也人服之入腹亦不耗惟見雞湯輒化

如服後不食雞湯次日糞出其藥仍在色亦不改
淘出洗淨復可再用氣亦不臭其功效食之能煖
婦人子宮拾男子下元虛冷入房術中用又史良
宇言曾見龍血結塊如棋子大光滑可鑿觸手冷
如冰夫龍純陽也而血獨冷又不解何故龍泄又
何物也其涎與血歟抑精與溺歟俱不可知悉存
其說以俟証

西楞魚

坤輿圖說大東洋海產魚名西楞上半身如男女
形下半身則魚尾其骨入藥用女魚更效

止血治一切內傷瘀損等症

鮓魚鱗

本經逢原鮓魚性補溫中益虛而無發毒之慮其
生江中者大而色青味極甘美生海中者小而色
赤味亦稍薄觀其暗室生光迥非常魚可比○綱
目主治言其肉補虛勞油塗湯火傷於集解下記
其鱗花婦人鈿飾不及入藥功用○張佳時云鮓
魚須乘活時拔划水邊二鱗尖長者佳若死魚鱗
便減藥力

湯火傷 逢原云用鮓魚鱗香油熬塗立效茅集

之云鱗魚鱗貼腿瘡疼痛立效

治疔 陳氏傳方疔瘡用鱗魚鱗貼上則咬緊先須與酒飯吃飽然後將魚鱗邊畧畧揭起些須用力急揭去疔根便帶出也但揭出疔根時極痛無比非醉飽卽暈倒也○傅氏方水疔用鱗魚腮下近腹處有划水二瓣瓣間有長鱗二瓣最佳但難得今人以背上大鱗代之貼上卽消○毛世洪經驗集鱗魚鱗用手剖下不可見水陰乾收貯此拔疔第一妙藥也用時以銀針撥開疔頭將一片貼上以清涼膏蓋之俟一宿揭開其疔連根拔出後

用生肌散收功予治兩貴婦大腳趾患瘡二三年不收功將鱸一片以銀花湯浸軟拭乾貼之不數日而愈

下疳 救生苦海鱗魚鱗焙乾煨研白色名白龍丹敷之卽愈得此可包醫

血痣 蔡雲白言人生血痣挑破血出不止者用鱗魚鱗貼之卽痂而愈

苦魚

劉基苦齋記匡山在處州龍泉縣劍溪之水出焉注入大谷其中多斑文小魚狀如吹沙味苦而微

辛可食故名

解酒毒可以醒酒

藥性考苦魚微辛形細色斑烹食腴美消酒除癆
金魚

此魚自宋南渡始有一名硃砂魚乃人家蓄玩於
盆盎中者有三尾四尾品尾金管銀管之分有蛋
魚名龍蛋文蛋虎頭反鱗諸品純紅純白或紅白
相間體具五色極大者三四寸小者寸許綱目金
魚條云主治痢而所用乃金絲鯉魚按金魚雖有
鯉鯽鱖諸種殊不知鯉魚中一種紅鯉名金鯉鯽

魚中一種紅鯽名金鯽皆有金魚之名與此全別而東壁台爲一則誤矣

味苦微鹹有小毒食之令人吐綱日本條氣味下云甘平無毒此指紅鯽而言並非今之金魚也

解服滷毒用金魚一二枚搗之灌下吐出涎水自甦

治瘋癲石礮水礮黃疸 慈航活人書俱用紅色金魚一個取三尾者甘蔗大者一二枚同搗爛絞汁服立刻卽吐出痰涎愈

阿羅魚

一首十身音如吠犬亦可禦火

珍異藥品

療癰疽

漢陂魚

輿地志鄆縣漢陂出魚味美可入藥

治痔

四足魚

物理小識游子六日閩高山源有鱧魚如指大其鱗卽皮四足可調粥入藥

治小兒疳

河豚目

子

蓬原云抉河豚目拌輕粉埋地中化水拔婦人腳
上雞眼瘡可以脫根

河豚子

性有毒可絕壁蝨行篋檢祕同鱗殼樟冰各五分
拌棉花子安牀下燒烟熏之

蜚蠊魚

三才藻異產撫仙湖狀如龜殼青大如盤無尾八
足腹白

食之辟瘴毒

蜜姑魚

宦遊筆記自光溪入四明二十餘里有蜜巖峭壁
千尋下臨深溪窅洞無底巖頭舊有蜂窠聚蜂數
百萬其蜜滴下溪魚食之故魚味甘絕曰蜜姑魚
其釣法倍多曲折魚性極喜苔須絕懸崖下有水
衣演漾深碧而細者剗以爲餌魚性暴遇釣則跳
宕卒不可制而蜜巖下溪水清甚用粗縵則恐魚
之瞥見而驚遊也用細絲則又恐不足以勝魚跳
宕之力釣者乃取絲長十餘丈盤於竿上遙望見
深波中魚詡詡鼓鬣而至則取絲徐徐放之如小
兒之送紙鳶者使得縱其所往魚入鉤果躍數

尺翻波跋浪橫激溪面其鱗光閃爍如千片碎金
雜珠顆中隨風散灑觀者莫不目眩心動已而徐
徐力倦乃可取之

性溫味甘食之生胃津益肺氣補血脈增髓去熱
除虛羸壯筋骨止嗽定喘功同燕窩蛤蚧也

按此魚最潔惟食苔蜜苔寒而蜜溫得水火既濟
之力大能補土生金燕窩性清肅而下行蛤蚧性
和中而溫臟此則故能兼之其勞嗽虛羸之食品
上藥也柳崖外編載張方海浙人少年讀書四明
山斷炊者數月山澗谷多竹峭壁有蜜蜜入江化

爲魚名蜜鮎張遂掘筍釣鮎而食自言筍味淡以清蜜鮎濃而美有天台胡麻所不如者嗣後遂輕身耐寒暑不復思烟火味據此則其功用信不誣也

雪鮎

粵語鮎魚廣人池塘多蓄之以魚秧長成與鮎性相反鮎屬土其性沉長潛水中鮎屬水其性浮長躍水上鮎食之可以實腸鮎食之可以行氣鮎守而鮎行性各不同如此其物以冬而肥故名喜泳浮波上得湊流則跳躍尋丈生食之益人氣力○

梧潭雜佩魚形似鱧而稍短味甚美作膾尤佳
健筋骨活血行氣逐水利濕

帶魚

出海中形如帶頭尖尾細長者至五六尺大小不
等無鱗身有涎乾之作銀光色週身無細骨止中
一脊骨如邊箕狀兩面皆肉裹之今人常食爲海
鮮據漁海人言此魚八月中自外洋來千百成羣
在洋中輒啣尾而行不受網惟釣斯可得漁戶率
以乾帶魚肉一塊作餌以釣之一魚上釣則諸魚
皆相啣不斷掣取盈船此魚之出以八月盛於十

月霧重則魚多霧少則魚少率視霧以爲貴賤云
綱目無鱗魚條獨遺此品故爲補之。五雜俎間
有帶魚長丈餘無鱗而腥諸魚中最賤者獻客不
以登俎然中人之家用油沃煎亦甚馨潔。福清
志帶魚身薄而長其形如帶無鱗入夜爛然有光
小者俗名帶柳。物鑿帶魚形纖長似帶脚尾而
行漁人取得其一則連類而起不可斷絕至盈舟
溢載始舉刀割斷捨去其餘。玉環志帶魚首尾
相啣而行釣法用大繩一根套竹筒作浮子順浮
洋面綴小繩一百二十根每小繩頭上拴銅絲一

尺銅絲頭拴鐵鈎長三寸卽以帶魚爲餌未得帶魚之先則以鼻涕魚代之凡釣海魚皆如此釣期自九月起至次年二月止謂之魚汛。○朱排山相園小識帶魚生海中狀如鰻銳首扁身大眼細齒色白無鱗脊骨如篋肉細而肥長二三尺形如帶亦謂之裙帶魚冬時風浪大作輒釣得之藁爲爇以致遠

味甘性平和中開胃

食物
宜忌

帶魚形長扁薄似帶色白無鱗肉細佳膾醃鮑風乾久藏不敗煎烹味美多食發疥

註

帶魚啣尾而

行得一可連數十醃食佳黑夜有光故有壽

藥性考

血鱧

出浙江甯波府慈谿縣以白龍潭產者爲第一他產者尾尖尙黑不能通體如硃砂紅也葛三春言白龍潭血鱧周身紅如血每年所產亦稀取其血冲酒飲可以驟長氣力行伍中學習八段錦工夫者多服之

增氣力壯筋骨益血填髓

沙魚翅

沙卽鮫魚種類甚多皆可食綱目鮫魚條集解下

瀕湖註云沙魚腹下有翅味並肥美南人珍之主
治下特載其肉皮膽之功用翅獨畧焉今人習為
常嗜之品凡宴會餽饌必設此物為珍享其翅乾
者成片有大小率以三為對蓋脊翅一刻水翅二
也煮之折去硬骨檢取軟刺色如金者淪以雞湯
佐饌味最美漳泉有煮好剔取純軟刺作成團如
胭脂餅狀金色可愛名沙刺片更佳

味甘性平補五臟消魚積解蠱毒食物宜忌益氣開膈

托毒長腰力閩部食疏清痰開胃進食藥性考

土附

嘉興縣志一名菜花魚以其出於菜花時最肥美
故名程大昌演繁露土部吳興人呼爲鮓鱧以其
質圓面長與黑鱧相似其鱗斑駁又似鱸魚故兩
名之長興謂之蕩部又曰蕩魚湖州府志鮓魚今
呼土部此魚質沉常附土而行不似他魚浮水遊
也故又名土附錢塘縣志土鷺俗名土哺以清明
前者佳藻異云吐哺產杭本名土附以其附土而
生也色黑味美兩航雜錄吐哺或曰食物嚼而吐
之故名攷按以上諸說皆無杜父之名而綱目載
杜父魚云其色黃黑有斑脊背上有鬚刺整人又

名渡父魚黃魴魚船釘魚伏念魚似與土附絕不相類沈雲將食纂陳芝山食物宜忌皆以爲今之土部魚卽杜父魚也此乃承山堂肆考之誤今土部杭城甚多一年皆有惟正二三月獨旺背黑亦有淡黑帶土黃色者不聞能刺人俗云此魚立冬後則伏土閉眼不食冬至後出土附土而行清明後開眼遍食小蟲蝦故有壽陳芝山云土部清明後頭上生紅蟲不可食細核其形狀食性與杜父全不相類何能強合予故於禽蟲考中魚類辨之甚詳以杜父入吹沙類而另立土附本條蓋不敢

附古人而欺後世也土部綱目所無復爲補之
味甘性溫○補脾胃治噎膈除水腫濕氣療一切
瘡疥此物又能扶陽其子用燒酒醉食頗能興腎
與對蝦同功以其食蝦力也

子 助相火煖腰腎

烏魚蛋

產登萊乃烏賊腹中卵也藥性考以爲卽雌魚白
味鹹開胃利水

青魚膽

梧潯雜佩青魚膽出藤縣之禡

禡字不見字書讀如荳郡人亦有此

姓
州洲在江中長可五六里許其上居民甚多水
多石上青苔此魚食之其膽極涼可入藥他處卽
不堪用魚大者百餘觔漁人網得必以聞官剖取
其膽乃鬻於市

白皮子

蟬史蛇生南海四五月初生如帶至六月漸大如
盤形似白綠絮而無耳目口鼻鱗骨一段赤色破
碎者謂之蛇頭其肉如水晶以明礬醃之吳人呼
爲水母鮮久則漸薄如紙俗呼爲白皮紙按今所
云白皮紙乃海蜃外面之皮非陳久之海蜃也一

名秋風子。朱排山柑園小識海蛇上有白皮潔白脆美過於海蛇謂之白皮子。綱目載海鮫名水母人以石灰礬水醃之去其血水色乃白其形最厚者謂蛇頭味更勝云而不錄其外皮之用且其言性暖可治河魚腹疾而農田餘話云水母本陰海凝結之物食而暖其性未詳東壁亦無發明敏曾居東甌數年見土人販鮫爲生者詢之據言其物確係海水所結東南海俱鹹遇春夏天雨在海中者一滴雨水入海輒有一小泡凝聚海面初則大如豆隨波逐蕩受日烘染漸長大成形如笠

本草綱目拾遺 卷十一
上頭下腳塊然隨潮而行土人撈鮓者每於海塗
間插竹爲小城以稻草作網圍之潮長鮓隨潮而
來入竹城爲網所絡不得去然後取之以刃斨其
中段耑然而開有似腸胃穢積者落落交下名蜚
花食之亦最美再以礬灰醃而售之按海爲陰水
天雨水屬陽相入而感便生此物受太陽真氣所
以日漸長大而性暖也

味鹹濇性溫消痰行積止帶祛風

貼爛腿 救生苦海用白皮子照瘡大小翦作膏
貼內摻銀硃

無名腫毒 集聽方用白皮子一片白糖霜揉軟
中開一孔貼土重者潰輕者散又止痛

流火 文堂集驗取海蜇皮薄者貼上燥則易之
頭風 貼兩太陽能拔風濕外出

膝竈風濕 以白皮子貼之

消痞 王聖俞云有二方一用白皮子同葶薺燒
酒浸服一用白皮子葶薺同煮止食葶薺自消痞
也。程克庵云凡小兒一切積滯用葶薺與海蜇
同煮去蜇食薺則諸積自消亦以積非寒不滯而
成海蜇能暖水臟葶薺化堅相因而用其效故捷

也同壽錄載其方治病用大葶薺一百個古錢二十個海蜇一筋皮硝四兩燒酒三筋共浸七日後每早喫四錢加至十個止卽愈

鮐魚

滇程記雲南百夷中有小孟貢江產鮐魚彼夷食之日御百婦故夷性極淫貴賤俱數妻其地亦產鸞薑。說畧云鮐魚產孟貢江牡者恆多牝而遊夷人常食其肉一日能御百女入藥用雄者壯陽道固精髓八十老翁服之多子

介部

海龍

赤嵌集海龍產澎湖澳冬日雙躍海灘漁人獲之
號爲珍物首尾似龍無牙爪大者尺餘入藥譯史
此物有雌雄雌者黃雄者青

功倍海馬益房箔催生尤捷效握之卽產

百草鏡云海馬之屬有三小者長不及寸名海蛆
不入藥中等者長一二寸名海馬尾盤旋作圈形
扁如馬其性溫味甘煖水臙壯陽道消痕塊治疔
腫產難血氣痛海龍乃海馬中絕大者長四五寸

至尺許不等皆長身而尾直不作圈入藥功力尤倍雖同一類形狀微有不同此物廣州南海亦有之體方周身如玉色起竹節紋密密相比光瑩耀目誠佳品也○介語蝦姑一名海馬其扁如蜈蚣者燒服主夜遺

海牛

本草原始海牛生東海海蠃之屬頭有角如牛故名其角硬尖銳有紋身蒼色有龜背紋腹黃白色有筋頂花點魚尾今房術中多用之氣味鹹溫無毒主治益腎固精與陽

白髓

粵志白髓可以治痰火其初得之神授廣人甚珍
之有口號曰烏耳鰓白甲魚滋陰降火只須與一
名玉鬘龍以其背上儂起如鬘龍也連首白者良
甲白而首足仍青者不及

補虛勞愈痰火滋陰降氣養血益精

髓膽

盧之頤云髓無耳以眼聽故其目不可瞥識精於
明復識於聰也不惟精專肝竅膽亦異衆而味大
辛穹脊連脇脇亦少陽膽府所屬此木金交互故

得聲色叠用而肝爲膽藏取決更相親耳

本草乘雅云味辛開聲管除癥瘕痞積息肉惡陰
蝕痔核令人以入房術用風斯下矣

痔瘡痔漏 家寶方鼈膽一個取汁磨香墨入麝
香冰片少許雞毛蘸塗

物理小識云鼈膽最辣通竅尤捷此人所未知者
螻殼

綱目螻條止載其肉云治冷痢補虛勞不及其殼
之功用

治喉風急痺 萬選方用螻殼置瓦上日曬夜露

經年取下色白如雪擣細水漂淨末曬乾同冰片
吹喉專治咽喉一切急症立愈

海螵

杭州府志海螵杭俗立夏以爲應時之味以花椒
灑之麻油拌食。○從新云北螺螵身細而長殼有
旋紋六七屈頭上有腐春初蚘起矴海崖石壁海
人設網於下一掠而取治以鹽酒椒桂按海螵有
大如指長一二寸許者名釘頭螺温台沿海諸郡
多有之海螵螺生海塗中立夏後有人見其羣變
爲童今人所稱豆娘是也或云此螺能跳丈許蓋

遷其處此物又能食蚶明州奉化多蚶田皆取苗於海塗種之久則自大時田者不時耨視恐有海蚶苗蓋蚶不畏他物惟畏海蚶蚶田中一有此物蚶無遺種皆被其吮食盡玉環出者大如指名釘頭螺

鹹寒治瘰癧結核能降鬱氣

辟蛆 雲客傳方立夏日食海蚶後以殼七枚勿令人見撒廁中或馬桶內暑日不生蛆蟲頗驗

吐鐵

沈雲將食物本草曰吐鐵海中螺屬也大如指中

有腹如凝膏白其殼中吐膏大於本身光明潔白可愛姑蘇人享客佐下酒小盃爲海錯上品一名麥螺一名梅螺產甯波者大而多脂餘姚者不及生食之令人頭腫土人以鹽漬之去其初次涎便縮可食○海味索隱曰土鐵一名泥螺出甯波南田者佳五月梅雨後收製○會稽志吐鐵歲時含以沙沙黑似鐵至桃花時鐵始吐盡見只編云九月可食蓋此物產泥塗以泥爲食八月至九月不復食泥吐白脂晶瑩塗上比他月出者佳○福州府志吐鐵爲海錯上品色青外殼亦軟肉黑如鐵

吐露殼外人以醃藏糟浸貨之四方別有小如菜
豆者桃花時方有名桃花吐鐵產泉州者名曰麥
螺○楷弟觀頤錄云吐鐵出海甯者無脂多泥肉
韌不堪食出甯波者極大多脂無泥肉脆水洗三
次用甜生白酒浸半日待鹽味出換白酒釀加燒
酒或單用燒酒浸亦可必多入白糖藏久不壞○
柑園小識吐鐵生海中微似扁螺殼薄而白肉青
黑色大者多脂以鹽漬之可以致遠

甘酸鹹寒補肝腎益精髓明目

按吐鐵色青得甲木之氣以斥鹵爲食不復他食

更得土之餘潤而生脂膏八九月不食土者以秋
金盛而木氣衰故吐泥而不食其能補肝腎益精
髓亦猶脾土得養化津液上升而并及耳目也東
壁以蓼螺爲泥螺味酸入肝二物形質不同性味
亦異則強合爲一誤矣此物又能潤喉燥生津予
庚申歲二月每患燥火入夜喉咽乾燥舌枯欲裂
服花粉生津藥多不驗一日市吐鐵食之甘至夜
咽乾亦愈可知生津液養脾陰之力大也

田螺涎

保元方田螺涎能去水腫用田螺不拘多少水漂

加香油一盞於水內其涎自然吐出取曬乾爲末
每服不過三分酒調下水自小便下氣自大便出
腫卽消再服養脾胃藥全愈

蛤蜊肉

厚殼紫口而圓者曰蛤蜊綱目本條下載其肉性
寒而關高武宗痘疹正宗以爲可發疹及治痘毒
入目取其汁點之說爲謬不知其肉惟性寒方能
解熱藥之毒正取其與丹石相反爲用耳

治癰疔痘毒 集聽載一捻金方治一切癰疽腫
毒初起最驗兼治疔瘡喉風蛇傷犬咬及小兒痘

毒乳香一錢雄黃三錢血竭錢半此三味不必製
沒藥一錢明礬一錢硃砂三錢紅信大錢麝香六
分蟾酥一錢蛤蚧肉二錢蜈蚣三錢甲片炒三錢
殭蠶一錢川烏一錢牙皂四錢共爲末以磁罐貯
之大人一分五釐小人七釐強者二分亦可將蔥
白三寸搗爛和藥爲丸好酒服下取汗再服不必
汗

蜆腊

蜆生沙泥中江湖溪澗多有其類不一有黃蜆黑
蜆白蜆金口玉口等名黃蜆殼薄肉肥黑蜆殼厚

肉薄又番禺章浦地方產無耳蜆更甘美異常凡
蛤之屬皆能孕子而黃蜆化蛾而散卵白蜆藉霧
以生形則又一異海南介語蜆在沙者黃在泥者
黑蜆老則肉出小蛾而蜆死小蛾復散卵水上爲
蜆凡南風霧重則多白蜆北風霧則否蓋白蜆之
生生於霧霧味鹹鹹爲白蜆所生之本始生時白
蜆之形如霧自空而下若無若有人見以爲霧也
漁人知之以爲天雨蜆子也蜆子旣成以天暖而
肥寒而瘠在菱塘沙灣二都江水中積厚至數十
百丈是曰蜆塘其利頗大綱目蜆下集解尙欠詳

石瀾海濱者爲第一此物生沙中仲冬始有過正月半卽無取者先以石礫礱磨沙岸使沙土平實少頃視沙際見有小穴出泡沫卽知有此物然後掘取之綱目海蛤蛤蚶條中獨遺此今依吳氏從新本補之

甘鹹平益精潤臟腑止煩渴爲補陰要藥

從新

宦遊筆記西施舌似車螯而扁生海泥中一名沙蛤長可二寸常吐肉寸餘類舌俗以其甘美故名石蚶

俗呼龜腳蛭海濱多有之古未聞入藥瀕湖獨增

此品止載其能利小便不知其別有功用今依介語補之

朱排山柑園小識龜腳形似龜腳生海中石上殼如鱗螯其色紫可食卽石蚶也江淹有石蚶賦

下寒游消積痞濕腫脹虛損人以米酒同煮食最

補益 介語

乾

蝦蝦米

蝦子鶯爪

對蝦

蝦生淡水者色青生鹹水者色白溪澗中出者殼厚氣腥以其得土氣薄也湖澤池沼中者殼薄肉滿氣不腥味佳海中者色白肉粗味殊劣入藥以

蚌且其主治下殼肉蜆水皆載而蜆脂無聞焉特

采介語以補

解蠱并治不服水土。

介語

蚌淚

蚌中水也蚌生淡水中色蒼入肝故有清熱行濕
治雀目夜盲之力綱目載蚌肉及蚌粉功用獨遺
其殼內所含之水不知此水乃眞陰天一之精入
藥最廣特爲補其缺

清熱安胎消痰除濕解酒積丹石藥毒

初生小兒啞驚逢原云用活蚌水磨墨滴入口中

少頃下黑糞而愈

湯火傷用生蚌炙水塗之

西施舌

屠本峻曰沙蛤土匙也產吳航似蛤蜊而長大有舌白色名西施舌閩部疏曰海錯出東四郡者以西施舌爲第一蠣房次之西施舌本名車蛤以美見謚產長樂灣中本草從新西施舌浙温州有之生海泥中似車螯而扁常吐肉寸餘類舌故名。

敏按臨安館劉芳洲明府署中劉爲諸城相國胞姪嬖言介屬之美無過西施舌天下以產諸城黃

湖澤中者爲第一以蝦煮曬乾去殼大者曰鶻爪
小者曰蝦米又蝦子名曰蝦春錢磨入月潮盛時
江濱人俟潮退後率於江沙淺水處撈取蝦子入
市貨買黠者以腐渣攪和須取少許置銅銚中和
鹽炒之色純紅者乃真多醃藏貯作來春食品網
目蝦及海蝦分條明晰於蝦內集解下載蝦米海
蝦集解下載對蝦皆不立主治僅云充饌品而已
故悉爲補正其缺

蝦米 味甘性平逐風痰 胡潛法製編有蛤蚧
蝦製法云食之補腎益陽蝦米一觔蛤蚧二枚苧

香蜀椒各四兩並以青鹽化酒炙炒以木香末一兩和勻乘熱收新餅中密封每服一匙空心鹽酒嚼下甚妙

鰾瓜 味甘性平治疔去癬

食物宜忌

治無乳及乳病蝦米酒 鮮蝦米一觔取淨肉搗爛黃酒熱服少時乳至再用猪蹄湯飲之一日幾次其乳如泉

宜吐風痰 不藥良方連殼蝦米半觔入葱薑醬煮汁先吃蝦後吃汁緊束肚腹以雞翎探引取吐赤白遊風 不藥良方蝦米搗碎敷之

蝦子 鮮者味甘醃者味鹹甘皆性溫助陽通血

版俱見食。敏按粵語云蝦春非蝦子也江中有

水蠶大儻如豆其卵散布取之不窮然則蝦春之

性當與蝦性有別陳芝山助陽之說或未加精核

耳

對蝦 粵志蟬蝦產鹹水中大者長五六寸出水

則死漁人以絲粘網其深四尺有五寸六寸者仄

立海中絲柔而輕蟬蝦至則鬚尾穿骨弗能脫也

兩兩乾之為對蝦鮮者肉肥白而甘。朱排山柑

園小識海蝦磔鬚鉞鼻背有斷節尾有硬鱗多足

而好躍大於溪河所生長尺餘鬚可爲簪土人兩
兩乾之謂之對蝦以充上饌。宦遊筆記淮海產
對蝦長數寸兩兩乾之勾結如環烹以爲羹味鮮
美居人往往以享客且可致遠或曰以雌雄爲對
但當懷子旣散之後雌雄亦無從辨至其出時自
正月望後始二三四月大盛端陽而後卽杳不可
得亦物理之不可推者也

補腎興陽燒酒浸服

治痰火後半身不遂筋骨疼痛 醫學指南核桃

仁棉花子仁杜仲炒巴戟硃砂骨碎補枸杞子續

斷牛膝各二兩大蝦米四兩兔絲餅四兩用燒酒
二十觔煮服如年高者加附子肉桂各一兩酒服
完將渣曬乾爲細末蜜丸每服二錢酒送下

蝦醬

粵語蝦醬以香山所造爲美曰香山蝦其出新甯
入襟海上下二川者亦香而細頭尾與鬚皆紅白
身黑眼初醃時每百觔用鹽三觔封定缸口候蝦
身潰爛乃加至四十觔鹽於是味大佳可以久食
解毒樹蠱 廣有毒樹蠱其樹無花結子如牛奶
食之立死以蝦醬解之

宦遊筆記遼東大凌河出蝦醬蝦油皆甘美平海
又出一種小蝦名紅毛子作蝦醬尤佳今浙江甯
波及蘇皆有蝦醬味亦佳

石上螺螄

俗名鬼螺螄形如海螄而小秋冬常在牆腳石隙
中夏月在濕地青苔上取用洗去土

治黃疸 慈航活人書取石上螺螄半碗搗如泥
無灰白酒頓熱沖服之

疔 濟世良方黃風膏治疔瘡及頭面熱毒瘡雄
黃一兩釘銹白梅肉各五錢消風散一兩夏月加

鬼螺螯二十個共研細末苦鹽酒調勻貯磁罐內
凡患疔腫毒瘡用銀針挑破毒頂敷上此藥以綿
紙蓋定其毒收斂不走三日後即愈。黃氏醫抄
取細長小鬼螺螯搗爛連殼敷患處露頭出膿次
日即可消

拔疔 保合堂秘方鬼螺螯一個荔枝核三個煨
存性白梅肉六個共搗爛成膏貼之取出疔根後
用八寶丹收功

鼻疔 慈航活人書花盆中青螺二三個同鹽搗
塗立效

白火丹 集聽丹有五種青黃赤白黑黃白易治
黑丹莫救青丹十日內可治赤丹亦然俱不可見
燈火食鹽物治法取溪澗中鬼螺螭酒煮食卽消
痕瘰氣悶者食數次愈

三漏丸 活人書治穿屁漏通腸漏瓜籐漏皆濕
熱之邪毒殺蟲退管穩當之劑土蜂窩煨鬼螺螭
煨蟬蛻煨各七錢乳香沒藥川萆薢酥炙陳棕煨
管仲煨各五錢猪懸蹄甲煨十個刺蝟皮炙一個
雷丸三錢黃蠟四兩化開加麻油六七匙入藥爲
丸桐子大每服六七十丸空心白湯下

通經 周氏家寶鬼螺螄十四個研碎油紙攤貼
臍上縛定週時此螺生在陰處

本草綱目拾遺

卷十 石上蟪蛄

三

蟲部

雪蝦蟆

憶舊遊詩話巴里坤雪山中有之醫家取作性命
根源之藥軍中人爭買之一枚價至數十金且不
易得也○朱退谷曾於吳門見之云遍身有金線
紋其形絕似蝦蟆

性大熱補命門益丹田能回已絕之陽功兼參附
火盛者不可服

內造伏虎丹 秘方集腋與陽種子強腎助神用
真川貝母四兩須四製第一次用大附子一個童

便一湯碗蒸切細乾燒酒三湯碗韭菜汁三湯碗
同入砂鍋將貝母煮乾去附子不用第二次用雪
蝦蟇一兩無則以大蛤蚧一對代之用石敲碎亦
用燒酒韭汁各三碗同貝母煮乾去蛤蚧不用第
三次用吳茱萸一兩亦用酒韭汁各三碗同貝母
煮乾去茱萸不用第四次用公丁香五錢亦用酒
韭汁各三碗同貝母煮乾去丁香不用製完其貝
母爛如泥置石臼中舂再入眞阿芙蓉一錢乳製
蟾酥二錢麝香五分拌勻作條焙乾收貯用時唾
津磨搽

雪裏蝦蟇性熱微辛壯陽卻冷痿弱能興藥性考

海參

閩小記云閩中海參色獨白類撐以竹簽大如掌與膠州遼海所出異味亦淡劣入藥以產遼海者良紅旗街出者更勝於綠旗街有刺者名刺參無刺者名光參入藥用大而有刺者佳一名海男子有梗糯二種而黑膩者尤佳人以腎爲海此種生北海鹹水中色又黑以滋腎水求其類也○百草鏡云南海泥塗亦產海參色黃而大無刺肉亦硬不中食品土人名曰海瓜皮言其如瓜皮之粗韌

也以其充庖煇猪肉食可健脾入滋補陰分藥必
須用遼東產者亦可熬膏作膠用○藥鑑海參出
盛京奉天等處者第一色黑肉糯多刺名遼參刺
參出廣海者名廣參色黃出福建者皮白肉梗糙
厚無刺名肥皂參光參出浙江甯波者大而軟無
刺名瓜皮參品更劣矣○關東韓子雅言海參生
東海中大小不一體滑如蜒蚰能伸縮羣居海底
遊行迅疾取參者用海狗油滴水海水乃清見底
見有海參卽入水取之此物沾人氣便不動先以
兩手探握置頸兩傍再取置助下次及兩腿膀及

膝皆可夾取此物一沾人氣卽不動然後出水以
刀剝去腸胃石灰醃去腥涎令體肉緊密乾之乃
縮至寸許其實生者大如瓜長尺許也若乾者寸
外生時體更大可知○蓬萊李金什言海參亦出
登州海中與遼東接壤所產海參亦佳彼土人言
海參多伏海中大石上水深不可見取參者必用
海狗油滴入水中則有一暈散開清澈見底然後
入水取之每每遭鯊魚毒害故其價亦不廉其體
生者身多滑涎去腸胃以灰醃去腥涎乾之出售
每多灰鹹氣也○福山陳良翰云海參生北海者

佳爲天下第一其參潛伏海底至二三月東風解凍時多浮出水面在海塗淺沙中孳乳入水易取然腹中出子後惟有空皮皮薄體鬆味不甚美價亦廉識者賤之名曰春皮四五月則入大海深水抱石而處取之稍難體畧肥厚至伏月則潛伏海中極深處石底或泥穴中不易取其質肥厚皮刺光澤味最美此爲第一名曰伏皮價頗昂入藥以此種爲上若秋冬時則又蟄入海底不可得矣。○五雜俎海參遼東海濱有之一名海男子其狀如男子勢然淡菜之對也其性溫補足敵人參故名

曰海參。○藥性考海參遼產者佳。吳淞閩粵者肥。大無味。虛火燥結。同木耳切爛入猪大腸煮食。歌云海參鹹寒降火滋腎通腸潤燥除勞怯症。遼產小佳刺密脆硬。南產厚大肉味稍遜。

甘溫。食物宜忌味甘鹹補腎經益精髓消痰涎。攝小便壯陽療痿殺瘡蟲。

生百脈血。臨安儒醫盛天然語予云曾往青山里視一婦人病眼鼻口耳髮根皆出血下部亦然。其人已昏不知人詢其夫得症之由數日前受驚而起時天酷暑大旱又中燥烈之氣致血溢奔騰。

上下散出卽不救矣諸醫皆斂手無策盛有叔曾
於都中得一方專治此症幸尙記憶遂急喚人取
山泉一桶燒酒一觔挾婦起坐裸其小腿先以燒
酒淋之俾酒從踝下卽滴入水桶內淋訖然後將
腿置水中一飯頃其上下血卽止婦亦甦面色如
粉急叫人覓壯年乳婦以乳哺之再用海參半觔
切片焙爲末每次調服三錢日三服蓋海參能生
百脈之血若失血過多必須以此補之其生血之
功捷於歸芍也

治休息痢 宋春暉云餘姚有孝子某其父患休

息痢經年垂危孝子日走神廟祈求醫藥如是月餘一日途遇老人教以用海參每日煎湯服不數日全愈

治潰瘍生蛆 慈谿楊靜山云曾有人患癰破爛內生蟲蛆纍纍千百計治以殺蟲藥無效一老醫以海參片焙末敷之蛆皆化黃水然後以生肌膏貼之愈據言凡一切金創及疽毒破爛交暑內潰生蛆惟海參末可療。不藥良方夏月潰瘍生蛆係陰濕所化海參爲末摻之或皂礬飛過爲末摻之皆化爲水

隊隊

游宦餘談隊隊形如壁蝨生有定偶緬甸有之夷婦有不得於夫者飼於枕中則其情自合故不惜金珠以易。詹景鳳小辨同年蘇侍御民傑按雲南還語予雲南有小蟲名曰隊隊狀如蝨出必雌雄隨人偶得之以賣富貴家價至四五金富貴家貯以銀匣置枕頭內則夫妻和好無反目此則物氣之正人也

入媚藥治夫婦不和

風蛤

職方考閩邵武府出風蛤類蝦蟇蟄我嶺峯麓之數
村每春初東南風起則此物滿牀厨間土人取而
脯之

性温煖治風及手足拘攣折傷

飯蒼蠅

謝天士云蟲中各種俱入藥用惟飯蠅無用故本
草不載其主治予精思十年求其主治不可得嘉
慶庚申偶在東江晤柴又升先生云昔在台州患
面疔初起卽麻木癢幾入骨不可忍山中倉卒無
藥有教以用飯蠅七個冰片一二釐同研爛敷之

卽不走黃如言果癢定次日漸痊旬日而愈

束疔根不走黃塗瘡疤卽生髮

吳秀峯用以塗小兒癩愈後脫疤不長髮用此搗

塗立生

塞鼻治拳毛倒睫

藥性考

蠟蜂

粵志陽春有蠟蜂嘗附橄欖樹而生雖有首足與木葉無別須木葉凋落乃得之土人以置篋笥每遇蠱毒必鳴鳴則自呼又以其聲之清濁卜禍福佩之辟蠱

蜜蜂

綱目止用子云入足陽明太陰而無用蜂者赤水元珠有治療瘰方用之爲補於後

赤水元珠云蜜蜂同杏仁葉蝙蝠蛇蛻治療瘰神效

苦蜜

出處州劉基苦齋記匡山之巔四面峭壁風從北來大率不能甘而善苦故植物中性之苦者莫不布族而羅生焉野蜂巢其間采花髓作蜜味亦苦山中方言謂之黃杜初食頗難久則彌覺其甘按

綱目言蜜有黃連蜜味苦不知更有天成自然之
苦蜜故補之

除積熱已煩渴解熱痢暑積驅風丸藥中用之更
佳老人腸燥以一盞和酒食尤宜

蜜虎

似蜂而大首尖身圓壯如橄欖形有兩翼亦如蜂
翅遍身生毛花斑色尾有短毫鋪張如鴛尾鼻上
有鬚二根喜入花心中以鬚鈎取花蕊而出其鬚
能伸縮屈曲如象鼻然以捲物登州人呼古路哥
于安嶽人呼爲蜜虎養蜜者最忌之。臺灣府志

蜂虎蟲屬狀似燈蛾而大頭有斑點入蜜蜂窠則盡食其蜂。汪杭葦言蜜虎多喜入鳳仙花叢中散子於葉背日久生小灰色蟲如青蠅體上有黑白斑暈食其花葉長大及老則下根底變爲蛹頭粗尾尖如海螵狀作老黃色久則蛹出爲蛾卽成蜜虎如此循環生生不已。

治咽喉腫痛生蛾 陳良翰云蜜虎登州最多人捕得裝入布袋懸挂簷下陰乾遇有咽喉腫痛或生單蛾雙蛾取一枚瓦上火焙去其週身絨毛剪去頭足尾翅再用火焙爲末加冰片少許吹入喉

中卽愈此神方也又入壯藥用

治心痛 鞠子靜方用囓嚙哥卽蜜虎五六月飛
行墻壁山東甚多取置竹筒中此物難死必待二
十日方乾死在筒中自能撲打體上絨毛盡落有
患心痛者及腹痛者瓦焙研末酒服一二枚卽止
諸城王遜亭云古路哥有雌雄雄者身瘦小雌者
腹大入藥用雄者以線穿陰乾可合房術藥用其
老僕王三云此蟲山東極多能食蜂養蜂家最忌
之其蟲口中有黑絲常捲若入蜂窩卽吐直其絲
以刺蜂蜂卽斃然後食之蓋蜂針在尾而此蟲之

針在首想亦有毒針在尾者陰在首者陽以陽尅陰故蜂爲所刺無不立斃其蟲於初秋散子在豆莢中則爲豆蟲如青蠖狀食豆在黍穰上則爲朝天猴如刺螫狀後黍葉自下食而上最爲莊田之患然可食莊人候日未出時此蟲着露體重翅輕不能飛易於撲取人捕得去其翅羣置瓦罐內令其自相撲擲其體上細毛自落然後以油鹽椒薑炒食之味勝蠹蛹但其體上毛不可着人眼着眼卽損目

蟾皮 舌

此乃癩蝦蟆皮也能拔大毒外出又能回毒功效不可殫述綱目蟾蜍條主治皆全用無單用其皮者惟附方引孫真人千金方中治腸頭推出用蟾皮一片燒熏并傳僅錄其些小功用反遺其大者故特著明補之

貼大毒能拔毒收毒○黃汝良行篋檢秘方載指頭紅腫生毒用活蟾一隻生剝皮將皮外面向患處包好明日其毒一齊拔出或發背對口等症毒忽收內如又起再貼切記不可將其皮裏面着肉卽咬牢難揭凡痘疹後回毒亦可用此治

癩癧斂口膏藥。治癩癧膿已盡腫已平瘡口未
斂以此貼之。蝦蟆皮二個要活剝者鼠皮二張
蛇退二條蜂房大者一個右四味俱煨灰將水膠
一兩用井花水一酒鍾化開後加蜜一兩蜈蚣煎
麻油一小鍾攪勻前四味灰臨起入麝香一分將
絹攤來不濕爲度

靈秘丹藥云凡患癰疽瘡毒者用土中大蝦蟆一
個剝全身癩皮蓋貼瘡口於蟁皮上用針將皮刺
數孔以出毒氣自覺安靜且能爬住瘡口不令長
大又可免蜈蚣聞氣來侵神妙神妙

舌

拔疔 外科全書夏月患疔用蝦蟇舌一個研爛蟾肚皮蓋貼其根自出

土檳榔

粵西鼓載狀如檳榔在孔穴間得之新者猶軟相傳蟾蜍矢也不常有之

主治惡瘡

蟻螯黃

物理小識余岸少養蜘蛛以小者飼大者久之以殊砂飼大者數十日滿身皆赤其腹有黃入藥用

去醫開瞽

藥蜂針

物理小識取黃蜂尾針合硫燉加冰磨爲藥置瘡
瘍之頭以火點之灸瘡上本草未載此法須先以
濕紙覆瘡先乾者卽瘡頭灸之

驢龍

物理小識驢腹中虬也方體方目有足可以小使
入房術用與臯厭黑兜蟲瓦雀卵衛子莖墮蛤蚧
吉弔脂同功

龍蝨

聞小記云龍蝨形如小蟬螂又似金龜而黑色每
八月十三至十五日飛墮漳州海口餘日絕無
除面上黝黥赤氣食之良兼美男女顏色活血
物理小識智少隨老父福甯曾見龍蝨後在姚有
僕署中食此云自濠鏡來則他處亦出此何漳獨
異也蓋是甲蟲大如指頂甲下有翅熏乾油潤去
甲翅啖似火魚之變味

洋蟲

一名九龍蟲出外洋明末年始傳入中國或云出
大西洋康熙初年始有此物形如米蚱子初生蟻

如小蠶久則變黑如豆瓣有雌雄今人用竹筒置
穀花飼之性極畏寒天冷須藏之懷袖中夜則置
衾褥間否則凍死得人氣則生極蕃衍有飼以茯
苓屑紅花交桂末者則色紅而光澤可愛入藥尤
良

性溫。行血分。煖脾胃。和五臟。健筋骨。去濕。瘳風。壯
陽道。治怯弱。○附治各症兼引。○老人不寐。茯苓
引。○小兒夜啼。硃砂引。○女童夜溺。枸杞引。○少
婦陰寒。附子引。○癰疽發背。沉香末引。○舌燥作
渴。麥冬引。○眼目閉痛。甘草引。○耳鳴耳聾。當歸

引。感冒風寒。防風引。中濕瘟毒蒼朮引。跌打損傷全蝎引。酒醉傷人葛花引。怒氣傷人沉香引。絞腸痧痛青蒿引。以上十四症俱用蟲十四個好陳酒沖服。

治刀斧傷用蟲搗敷卽愈。瘋癱用蟲九個木香湯送。打傷用九個黑棗薄荷湯送。黃疸痧用十二個薄荷燈心湯送。哮喘用九個薄荷湯送。眼脹用七個薄荷湯送。傷食用九個薑湯送。水毒用九個薄荷燈心湯送。氣痛用九個檳榔湯送。中風不語用二十四個薄荷燈心湯送。

○小肚痛用九個薑湯送○急慢驚風用九個薄荷杏仁湯送○喉痛用二十四個薄荷銀花湯送○脾風用二十四個酒送○胃痛心疼用七個木香末沖酒服○無名腫毒用十六個陳酒送五更服○痘疹用七個米湯沖服○膨脹用二十四個薄荷陳皮湯送○嘔吐痰火用七個淡薑湯送○乍寒乍熱口乾舌燥用七個陳皮半夏煎酒沖服○五勞七傷白茯苓三錢用七個搗爛每日空心酒沖服以復元爲止○瘧後寒熱不調用七個以未發之先沖酒服三次卽止○夢遺白濁血淋白

帶以芡實三錢微炒研末白果五枚去皮心先將藥搗爛再加淫羊藿二錢去邊廣皮三錢韭子三錢同煎用蟲七個酒沖服。赤白帶及產後等症以香附炙芪烏鱗骨各八分酒煎用蟲七個沖服即愈。氣急咳嗽以川貝母二錢牛蒡子當歸陳皮淮牛膝各八分水煎服如婦人去牛蒡子加益母炒香附各三錢水煎沖服三次神效。腰痛以破故紙二錢雄豬腰一對竹刀剖開去衣將破故紙內入酒蒸熟爛加桔梗二錢爲末用七個搗沖酒服神效。痢疾白痢用紅糖紅痢用白糖陳酒

沖蟲七個服。水瀉不止猪苓白朮各一錢陳酒煎沖七個服之。忌油膩魚腥等物。偏正頭風以川芎防風荆芥蟬蛻各一錢細辛八分陳酒煎沖七個服之。忌生冷葱韭等物。骨節酸痛胃寒等症以川芎白朮各八分酒煎沖蟲七個服三次即愈。吐血不止喘息燥熱等症以古墨研濃貝母三分研末蟲七個陳酒沖服七次愈。小便不通以燈心車前各七根蟲七個陳酒沖服。飽悶成痞肚腹腫脹用酒沖七個服三次。翻胃隔食以生薑七片裝布袋內入糞坑浸七日取起清水洗

淨埋土中一層蠶一層土七日取起用陰陽瓦焙
乾研末每次一分用蠶七個沖酒服三次愈○吐
血以藕節茅草根洗淨酒煎用人乳酒各半沖七
個服三次愈○筋骨疼痛以核桃肉三錢陳酒沖
蟲七個服○勞嗽以牛骨髓三錢核桃肉三錢其
爲末入蟲七個再搗爲丸每丸三錢每日五更啣
化一九九日見效○痿症蛇床子三錢煎湯沖蟲
九個服三次卽愈久服延年種子○經水不調以
香附陳皮益母草當歸元胡索各八分水煎和酒
沖蟲七個服之卽愈久遠者連服數次其效如神

○產後崩症以香附白芍益母草當歸陳皮茯苓
白果蘇木各八分酒沖蟲七個服三次卽愈

藥性考洋蟲色黑形如壁蝨活吞數枚止血勞怯
糞如蠶砂狀金御乘云研末敷金刃傷立結痂
止血最效

蟋蟀

綱目於鼯馬下附促織僅列其名云古方未用附
此以俟考

性通利治小便閉○藥性考蟋蟀辛鹹溫能發痘
勝於桑蟲

治跌蹠傷小肚尿閉不出。養素園集驗方用蟋蟀一枚煎服立驗。

小兒遺尿 慈航活人書取全蟋蟀一個焙末滾水下照歲服如兒十一歲者每次服一個服至十一個爲止。

治男婦小水不通痛脹不止。集聽用蟋蟀一個陰陽瓦焙乾爲末白滾湯下小兒半個卽通。

催生 趙際昌云鬪蟲之戲蟋蟀最盛其百戰百勝者俗呼爲將軍其蟲至冬必死勿輕棄去留以救產厄神驗凡產不下用乾者一枚煎湯服卽生。

并無橫倒之患

許京尼云關蟋蟀家冬則封盈竹其日死成對乾之留爲產科痘科

用須成對者入藥

治水蠱

朱煊齋任城日鈔云促織可治水蠱昔

有人患水蠱百治不效一日偶飲開水水中允有促織一對在內其人倉卒一併吞之越數日其病漸消方知促織可治此症後傳此方數人無不驗者一對不足連服二三對自效

蚱蜢

綱目蟲蠹僅引拾遺佩藥一條並無主治

按蚱蜢初夏大火始有得秋金之氣而繁性竄烈

能開關透竅一種灰色而小者名土礫不入藥用
大而青黃色者入藥有尖頭方頭二種救生苦海
五虎丹中用之治暴疾氣閉大抵取其竄捷之功
爲引也

味辛平微毒性竄而不守治咳嗽驚風破傷療折
損凍瘡癩疹不出

治鷓鴣瘟 王氏效方鷓鴣瘟其症咳嗽不已連
作數十聲類哮非哮似喘非喘小兒多患此取穀
田內蚱蜢十個煎湯服三劑愈。百草鏡云鷓鴣
鷓小兒有之其症如物哽咽欲吐難出之狀久之

出痰少許日久必死治以乾蚱蜢煎湯服

破傷風。救生苦海治破傷風用霜降後稻田內收方頭灰色蚱蜢同穀裝入布袋內曬乾勿令受濕致生蟲蛀壞常曬爲要遇此症用十數個瓦上煨存性酒下立愈

痧脹。養素園集驗方用蚱蜢五六個煎湯溫服
凍瘡。養素園待驗方用方頭黃色蚱蜢風乾煨研香油和搽搽亦可

小兒驚風。李氏表方用蚱蜢不拘多少煨存性砂糖和服立愈。一方治急慢驚。量大小人多寡

用之煎服。○王立人易簡方用螞蟥焙乾爲末薑湯調服少許立愈。

急慢驚風。百草鏡霜降後稻田中取方頭黃身蚱蟻不拘多少與穀共入布袋內風乾常曬勿令受濕蟲蛀遇此症用十個或七個加鈎藤鈎薄荷葉各一撮煎湯灌下渣再煎服重者三劑愈李東來常施此藥據云山東王蟲尤妙每服只須二個。○王站柱不藥良方急慢驚風先用白鳳仙花根汁半盞服下卽用方頭蚱蟻焙乾研末滾水調下卽愈。

產後冒風。王良生救急方乾蚱蜢數十個瓦上煨存性好酒調服

淮東子

今名跳蝦蟲生濕土中形如跳蚤而大逾倍色如蝦青腹下多足如蝦善跳躍兒童以器置於水中捕得輒投入便不能躍出秋時鬪蟋蟀家多畜之凡蛩遇鬪傷及虛羸必每日以此飼之云能益蛩力也其性最竄捷能達透經絡皮裏膜外無不行到

治風痺去濕腫

燈蛾

今古方無入藥者祝氏效方有治痔管法用蠅螂
一個同撲燈蛾十個放罐內一宿加麝香一錢陰
乾爲末吹入管內自能出水水乾卽愈

蠅虎

古今註蠅虎蠅狐也形似蜘蛛而色灰白善捕蠅
一名蠅虎子潛確居類書一名蠅豹身黑嘴有雙
肉爪攫蠅而食兩目似虎炯然生光易曰震來虩
虩雅俗稽言曰虩蠅虎也常若多懼故取象焉○
按蠅虎亦蜘蛛之屬腹亦有絲而不能結網惟居

墻壁捕蠅食其體灰褐色身上有微毛嘴有兩鉗
翕吸頻動跳躍如虎亦有純白色兩目朱色絕可
愛兒童捕置器中捉蠅以飼之視其搏躍爲戲此
物未聞入藥故瀕湖綱目壁錢蠓蟻皆列入而此
獨遺之今徐氏驗方云其性頻動而不靜取以調
血脈治跌打因錄其方以備品云

治跌打損傷 徐順之驗方取蠅虎數個研爛好

酒下

寵馬

今之寵馬俗呼驢郎又作螳螂綱目所謂蜚蠊也

綱目蟲部亦有竈馬形如蟋蟀今人名竈壁雞叉
與蟬螂別瀕湖於菑蠓條下無治疗疔諸法今備
錄之

拔疔 集聽竈上蟬螂不拘多少搗爛敷之其疔
根自出。卿子妙方蟬螂蟲其黃紫色甚臭者取
數個用患者自吐唾沫幾口研爛敷瘡四圍頂上
露孔使毒氣從孔出一日愈矣。邵仲達方治疗
瘡取蟬螂大者七個去頭足殼將砂糖少許同搗
爛敷疔四圍露出頭晝夜即愈

藥性考竈馬拔刺搗塗有效

解諸疔毒。傳信方竈上紅蟬螂五個研爛熱酒
沖服取汗爲度。

紅絲疔 傳信方蟬螂一個去頭和青糖搗爛搽
上卽效。

白火丹 葉氏方用蟬螂瓦上焙乾爲末白滾湯
服一二個立效兼治疔瘡。

對口 活人書桂州荔枝肉二三枚蟬螂二三個
同搗如泥敷露頭數次卽散。

無名腫毒 慈航活人書蟬螂十個鹽一撮同搗
爛敷之留頭。

治諸毒惡瘡 嚴氏家用方 蟑螂搗石灰敷之

痧症 周廷園方 活蟑螂蟲二三個 用紙包竈上焙乾 研細冷水和灌 或吐或瀉卽愈

吐血 徐雲生方 取蟑螂五個 止去翅 淨在火盆淨瓦上焙乾 爲末 紙包安土上 存性 用濕腐皮包一個 滾湯吞下 每日如此 吞五日 不可間斷

氣虛中滿 醫宗彙編 以蟑螂七個 爲末 用地枯饅煎湯送數服 愈

臃脹 家寶方 蟑螂一個 焙乾 蘿蔔子一撮 共炒烏末 好酒吞十日 全愈

一切兒疳 集聽云凡小兒患疳疾不拘何等疳
垂死者皆效取竈上蟑螂焙乾與之食患者但聞
其香不知有腥臭之氣猶中蠱者食豆無辛含礬
不苦也有患此症治之無不效只須食一二次卽
愈愈後體更肥白且屢試屢驗○百草鏡云兒疳
初起用蟑螂去頭足翅新瓦焙乾常與食之百個
病愈

水馬

綱目名水黽於主治下云令人不渴殺雞犬不知
有治痔之功更爲補之按水馬四五月內出浮水

面身硬腳長池沼中甚多性喜食蠅子在甌親見
小兒捕之嬉戲用釣竿繫繩繩頭穿一蠅擲水面
誘之卽來以四足抱蠅不放因而獲之

治痔 東醫寶鑑有水馬散夏月三伏內於止水
中採婆子一名水馬兒高腳水面跳走是也採取
三十個用三個紙包每包十個於背陰處懸掛陰
乾每包作一服研爛空心酒調下良久乃吃飯三
日連三服十日內效久痔膿血者二三十服絕根

壁蝨

俗呼臭蟲以其氣腥穢觸鼻故名行必南向爲南

方穢濕所產今江南北人家多有之稍不潔卽生此物亦有遠行於旅店驛舍中帶入衣被歸家卽生極易蕃育一日夜生九十九子與益斯同其形儼如半粒豌豆老則黑次則棗皮紅初生者色黃而細小其子如蟻子白色卵生與蝨同初生便嚙人生一二日卽能褪殼愈褪愈大漸漸而老色轉紅而黑老者嚙人愈毒多藏藁薦中及壁內或桌櫬牀縫間其身扁而易入至冬則入蟄多藏泥沙山穴中及古樹根下交春皆啟蟄而出入人家壁木內藏性畏蟻山中有一種紅蟻喜食之故近山

及山寺僧舍此物甚少有帶入者輒爲山蟻啣去其嘴人尤狡黠不與蚤蝨同昔人謂暑時有五大害乃蠅蚊蝨蚤臭蟲也然蠅蚊迭爲晝夜蠅可揮拂蚊可設帳蝨則暑時裸浴生者絕少蚤則因土濕而生夏時土乾亦不甚患惟此最可憎無分晝夜潛身牀蓐及几闌間善識人氣伺人一徙倚卽啗其膏血腫塊纍纍如貫珠然愈爬搔則愈大痛癢難禁小兒肉嫩尤遭其苦輒叫號不已或云其物口有白氣一二寸嚙人能隔席穿膚吮血索之不可得在牀褥輒夜聚曉散率其醜類待人倦睡

而恣敬焉古方辟除之法甚多無一驗者惟蓆下鋪零陵香草及樟腦可稍殺其勢然隔一二日藥氣滅則橫虐愈甚惟用真揚州安息香塗上好銀珠爲衣燃牀下周圍以蓆護令烟薰透則壁蝨盡死子亦不能復生第香氣惡烈觸鼻令頭痛須熏後停一二日方可臥宿貧家何能辦理古云南方淫氣生短狐此亦淫濕腥穢之氣所感而生凡勤潔之家鮮有之閩人云此蟲滾水泡死者能復生惟以冷水浸死不能復生山堂肆考壁蝨身扁而臭不能跳善齧人名曰菱蚤又名扁蝨五雜俎壁

蝨閩人謂之木蝨多杉木所生治者以蕎麥葉燒
灰水淋之江南壁蝨多生木中惟延綏生土中遍
地皆是入夜則緣牀入幙嚼人遍體成瘡雖徙至
廣廈懸牀空中亦自空飛至事物紺珠壁蝨一名
壁駝扁小褐色歟而嚼人六書故扁蝨着牛馬食
其血產薦薜間差小嚼人膚俗謂薦蠅又名茭蝨
今人訛爲壁大是古人雖有其名從無入藥者綱
目并不列其品近來治療有用此者故錄之見天
下無棄物也

氣腥味微鹹性平在土者有毒

凡用壁蝨須置溫水中令其臭氣散

盡入藥

治咽痛 集聽方用壁蝨十枚滴花燒酒浸服

飯館 百草鏡云用臭蟲研塗

賺瘡臭爛 西亭藥鏡用臭蟲同水龍骨搗和麻

油調敷出盡黃水立愈

眼生偷針 臭蟲血點之卽散

海上方有用壁蝨治小兒驚風用壁蝨於淨水中

漂去臭氣焙乾入藥

拔疔 楊氏經驗方臭蟲同米飯搗勻搽疔上能

立拔疔根外出

本草綱目卷之九
醫宗彙編四谷茴香葉使鹽花燒酒
搗糊瘡上如口久爛用臭蟲斮去頭傳之

叩頭蟲

形黑如大豆以手按其身其頭能俯屈剝剝有聲
出南方者小而力微北土者大而力厚小兒捕之
爲戲入藥用大者試法取蟲置桌翻其背令仰少
頃便跳起三四寸有跳起過五六寸及尺許者力
更大綱目以之附阜螽後亦不言主治之功此蟲
北人謂之跳百丈

治腰腳無力與山螞蟻子並入壯藥用百草鏡云

外用可絕瘡叩頭蟲一個安眉心蟲頭向上膏藥
蓋住過時自愈

大力丸 彙集此馮嘉寶方 痰藜酒洗炒去酒刺
白茯苓白芍 從蓉酒洗杜仲酥油炒兔絲子酒煮
續斷當歸覆盆子威靈仙破故紙薏苡仁各一兩
五錢牛膝酒洗無名異自然銅醋煨七次一兩乳
香沒藥硃砂飛過血竭青鹽各五錢天雄二兩童
便浸五日象鱉一個去頭足翅如無用土鱉代之
跳百丈十個去足虎骨二兩酥油炙上藥俱爲細
末煉蜜丸二錢半重早晚鹽湯或黃酒送下少時

用力行功散於四肢

沙雞母

物理小識土鼈是象房屎中所生或以旋土成窩者充之不知旋土窩者乃沙雞母非土鼈也

同金墨磨塗口瘡

禾蟲

閩廣浙沿海濱多有之形如蚯蚓閩人以蒸蛋食或作膏食餉客爲饑云食之補脾健胃廣志夏暑雨禾中蒸鬱而生蟲或稻根腐而生蟲稻根色黃蟲乃稻根所化故色亦黃大者如筋許長至丈節

節有口生青熱紅黃霜降前未熟則蠹亦熟以初
一二及十五六乘大潮斷節而出浮游田上網取
之得醋則白漿自出以白米泔濾過蒸爲膏甘美
益人得稻之精華者也其醃爲脯作醢醬則貧者
之食。吳震方嶺南雜記禾蟲絕類螞蝗青黃色
狀絕可惡厭潮所淹沒淡水田禾根內出數尺長
至丈餘寸寸斷皆活能游泳午後卽敗不可食滴
鹽醋一小盃裂出白漿蒸雞鴨牛乳最鮮。粵
錄禾蟲狀如蠶長一二寸無種類夏秋間早晚稻
將熟禾蟲自稻根出潮長浸田因乘潮入海日浮

夜沉浮則水面皆紫采者以巨口狹尾之網繫於
杙逆流迎之網尻有囊重則傾瀉於舟

補脾胃生血利濕行小便瘡瘍勿食能作膿

茄裸蟲

此蟲生茄裸內梗上有蛀眼內卽有蟲其蟲帶絲
色黑嘴者是

治男女童癆 劉羽儀經驗方云男女童癆其症
不必如大人咳嗽吐血洩精只是身體瘦弱皮毛
焦枯肌膚微熱急宜早治用野茄裸內蟲取數十
條私和在食物之內與病者吃數次卽愈

椶蟲

滇南各甸土司記椶蟲產騰越州外各土司中穴居椶櫚木中食其根脂汁狀如海參粗如臂色黑土人以爲珍饈土司餉貴客必向各峒丁索取此蟲作供連椶木數尺解送剖木取之作羹味絕鮮美肉亦堅韌而腴絕似遼東海參云食之增髓益血尤治帶下彼土婦人無患帶者以食此蟲也治赤白帶腸紅血痢其行血而又能補血功同當歸

蔗姑

漳泉種蔗田中出一種蟲如蠶食蔗根名蔗蝓土人食之味甚甘美

發痘行漿托癰清毒化痰醒酒和中利小便

桃絲竹蝨

此桃絲竹上所生竹蝨李氏草秘云罨疔瘡痘疔最妙

牙皂樹蟲

救生苦海云此樹大如錢粗者方得有蟲但取之有法以利刀速斫其樹遲則蟲卽下行入根不可得其蟲子時下行過午則上行須午後伐取

治一切腫毒初起其蟲有大小大者用一條小者用二條證輕者用一條證重者用二條或三條搗爛酒調服已膿者不治

黃麻梗蟲

須秋時先收取以葱管藏之。百草鏡麻蟲生麻梗近根上一節中二月化爲飛蟲穿穴去山左人每於刈麻時將蟲連麻梗寸斷布袋裝盛帶至南方貨與養禽鳥家飼畫眉百翎之用云其蟲性暖去風行血鳥食之可以禦寒蟲形如小蠶細長明淨入藥須連麻梗蒸焙用如用生者須以葱藏

下取之以夜性熱助陽入蟬箔用

去痔管 用芝蔴蟲如蠶綠色取焙乾爲末開水
送下每日一錢服七日其管自出

桐蛀

李氏草秘生桐油樹中卽木蠹也最治惡腫毒取
七根焙末沖酒服卽愈

牛膝蛀

李氏草秘蟲生牛膝草節中香油浸製

治指頭毒晝夜痛不可忍者敷上卽愈

山螞蟻窠

子

朱樂只云山草中有之係草樹之葉結成大者如斗冬月取之蟻在土而不在窠矣。救生苦海山蟻窠深山內大樹根中有之十一月或正月草枯時尋取有二種一種大如升斗色黃柔軟形如乾黃爛葉又若柔皮紙窠皮上層層有刷紋成暈若虎頭俗呼虎頭螞蟻窠不知何物所造惟內中多筋其筋係松毛草莖之類也抽去內中筋及泥土用之一種色白係是泥土所爲其形有類松皮研用入藥

久不收口爛瘡貼之卽收口

治刀傷出血 救生苦海用山蟻窠抽去內中筋
及泥土包裹傷處再用布縛卽血止收口沈氏傳
云冬月用之有驗如神

禿瘡 周氏傳方山螞蟻窠中土鹽酒調敷數日
卽愈

生皮結靨。凡瘡膿腐已盡新肉已生不肯收口
用山蟻窠搓去草泥等物扯開貼之卽結靨生肉
。張聖來云山蟻生深山窮谷中頭如虎有牙鉗
甚銛利有翼能飛凡虎食人過飽則醉醉後卽吐
蟻食其唾餘則形變虎頭而生翼卽以其所吐涎

啣樹汁草漿和山土釀如泥緣樹枝成窠其窠重
疊如蜂窩內有臺外則黃白紋大如斗掛樹枝上
山人見其窠以烟薰去蟻採之入藥

窠敷金刃傷止血定痛生肌收口

窠中臺治發背百鳥朝王毒

窠上緣枝治蛀脊

子 白如粳米俗呼狀元子大力丸用之然微有
毒食之作脹綱目蟻下僅存其名無主治近行伍
中營醫以此合壯藥頗效

益氣力澤顏色

敏按蟻有各種入藥用窠則取山蟻窠蓋山蟻形
大在草中或樹根內作窠其子粗如粒米入藥力
太猛用于以黃色細蟻所生子爲佳蓋此蟻力最
大能舉等身鐵故人食其子亦力大也○宦遊筆
記廣人美味有蟻子醬於山間收蟻卵淘淨滓垢
鹵以爲醬詫爲珍品則其子亦無毒矣

蛆窠

王安采藥錄大窖坑內有蛆蟲窠如白繭子樣挂
在蓬堞內者取來淨去泥灰曬燥焙用

治癩瘡疔疔一切蟲蛀爛孔外科收口藥用

疔瘡蛙梗 柴氏獨妙方用糞坑內蛆蟲窠在蓬
塵內者形如白繭子而小取來不拘多少放在罐
中焙燥爲細末貯小口瓶內瓶口以細絨紗包紮
覆轉輕輕敲彈少許藥末於瘡口內如有小蛙眼
藥末不能入用麥草稈吹藥入細孔內每日三五
次其蛙爛者肉孔自能長平神效無比

死人蛙蟲

人蚘

此檢尸場中棺內死蛆也唐怡士云凡人死後魂
魄散盡其生氣有未盡者肉爛後悉腐而爲蛆攢
嚙筋骨久之蛆亦隨死故強死者棺中無不有黑

蛆凡用須間作於尸場收之

治大疔瘋癩疾。赤水元珠治大疔瘋癩疾秘方

用死人蛆蟲洗淨鋼片上焙乾爲末每用一二錢
皂角刺煎濃湯調下若腫而有疙瘩者乃陽明經
濕熱壅盛先以防風通聖散服二三帖然後再服
此藥有補功以皂針爲引故能達表能久服之極
有神效非泛常草木可比也。醫學指南有治大
疔瘋秘方用人蛆一升細布袋盛之放在急水內
流之乾淨取起以麻黃煎湯將蛆連布袋浸之良
久取起曬乾再用甘草煎湯浸曬乾又用苦參煎

湯浸曬乾又用董便浸曬乾又用葱薑煎湯投蛆
入內不必取起就放鍋內煮乾焙爲末每一兩加
麝二錢蟾酥三錢共爲一處入磁器內每服一錢
石蘚花煎湯下花卽山中石上生白蘚如錢樣用
蒼耳草煎湯洗浴然後服藥七日見效體壯者一
日一服體弱者二日一服卽愈

治勞瘵能驅尸蟲以賊攻賊之義跌撲絕邪瘡尸
蛀石疣

驅癆蟲 吳秀峯虛勞論云癆有蟲爲濕鬱所化
在外爲蠱在臟腑爲蟲用死人身上蛆蟲製令潔

淨焙乾和藥服之則癆蟲化爲水下

人蚘

陳所安今見錄近有一種不肖奸徒輒於攢殯左右勾賄寄戶寄戶者以產賃人厝棺杭人呼爲開寄場每有七日內之出厝棺木到場卽被昏夜啟棺竊取人蚘貨與方術家及走醫爲夾棍藥并治跌打絕邪瘧等用予初不解人蚘爲何物後詢唐博士與宜博士家有老僕來升曾見之云凡人死七日外遍身肌肉腐如漿心氣散漫蒸爲人蚘形如九龍蟲而小色赤如血光滑異常男女皆有入

藥男棺者佳其取之法用大鑽於棺和頭前鑽一大孔以香糟塗孔外內蟲聞糟氣皆從孔出其蟲雖有甲而不能飛用手搨投入小瓶中燒酒浸陰陽瓦二焙乾用


按人死血肉腐爲蟲或爲蛆或爲蚘形各不一或云二物並生或云一物先後互化又有云貧窮者多蛆少蚘富厚者多蚘少蛆第勿深考並存其說以俟博雅君子折衷焉

虹蟲

物理小識虹爲淫氣方士於東海見虹處掘地得

蟲紅色得之入術用

媚藥益幃箔同紫稍花功力更大



本草綱目拾遺跋

本草綱目拾遺十卷乾隆間吾杭趙恕軒先生所著
利濟十二種之一也十二種者醫林集腋養素園傳
信方祝由錄驗囊露集本草話串雅花藥小名錄升
降祕要攝生閒覽藥性元解奇藥備考及是編也全
目及總序備載於是編卷首鮑氏彙刻書目亦載十
二種之目但有傳鈔本皆未刻至嘉慶末年傳鈔本
則止有是編與串雅二種其十種已不傳且是編每
藥品下論列各條顛倒錯亂眉目不晰余因訪知杭
醫連翁楚珍藏其稿本假閱乃先生手輯未繕清本

者初稿紙短續補之條皆黏於上方黏條殆滿而未注所排序次故傳鈔錯亂耳余乃按其體例以稿本校正排比傳鈔本之誤然後各條朗若列眉還其舊觀原稿本仍歸返連翁迨庚申寇亂翁家原稿本亡失串雅亦佚余編繕此本幸攜帶僅存得存先生遺著之一亦足寶重矣余又聞雍乾間杭人汪君懷著有草藥綱目一書哀然大部與瀕湖綱目等其稿未傳鈔訪諸其族人皆未見想已湮沒失傳恨未得其書與李氏趙氏鼎峙爲本草之大全也惜哉同治甲子秋日錢唐張應昌仲甫氏撰

鈔成之後偶於閱書時有可補輯參攷者綴注一二聊以備考愧未能博搜旁證也

遭亂貧困無力獨刊鉅公摯友頗多賞是編者助資勸梓旣集腋因亦自措補足之而衆施義舉未可掠美也備誌于後

捐助刊刻刷印姓氏

南皮張子青督部

之萬

長白恩竹樵方伯

錫

秀水杜小舫方伯

文瀾

錫山秦澹如都轉

湘業

吳縣潘順之侍讀

遵祁

吳縣潘季玉方伯

曾璋

歸安吳平齋觀察

雲

元和顧子山方伯

文彬

吳縣吳語樵部郎

嘉儀

海甯沈問梅大令

錫華

錢塘吳曉帆方伯

煦

錢塘丁松生大令

丙

錢塘濮少霞觀察

詒孫

錢塘周麟叔觀察

家勳

仁和高白叔孝廉

雲麟

錢塘吳子厚明府

同培

續捐

吳江蒯士薌廉訪

歸安沈仲復方伯

秉成

夏邑李薇生都轉

銘院

錢唐薛頌唐大令

振鈺